

## DOMENIE XIV «VIE PAL AN»

### Antifone di jentrade Sal 47,10-11

**O** stin pensant, Diu, al to boncûr  
denti dal to templi.  
Come il to non, ancje la tô laut, Diu,  
e rive sun dute la tiere;  
incolme di justizie e je la tô diestre.

### Colete

Diu, che inte umiltât di to Fi  
tu âs tornât a tirâ sù il mont che al jere colât,  
da ai tiei fedêi une sante contentece  
par che a puedin gjoldi pe eternitât  
chei che tu âs sfrancjâts de sclavitût dal pecjât.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Ez 2,2-5

**A son une cjase cjaviestre, però a varan di ricognossi che al è stât un profete framieç di lôr.**

Dal libri dal profete Ezechiël

In chei dîs, al vignì denti di me un spirt che mi fasè jevâ in pîts e scoltâ chel che mi fevelave.  
Mi disè: «Fi dal om, jo ti mandî te cjase di Israel, di une int cjaviestre che si è rivoltade cuintri di  
me; lôr e i lôr vons si son rivoltâts cuintri di me fin in dî di vuê. A son fîs cu la muse insolent e cul  
cûr dîr chei che jo ti mandî di lôr. Tu ur disarâs: Il Signôr, gno Diu, al dîs cussì: Joi, se a scoltassin  
e le finissin! Ma a son une cjase cjaviestre. Però a varan di ricognossi che al è stât un profete  
framieç di lôr».

Peraule di Diu.

### SALM RESPONSORIÂL dal Salm 122

**R.** I nestris vôi a cjalin de bande dal Signôr.

O alci i vôi de tô bande,  
a ti che tu sês a stâ tai cîi.  
Ve: come i vôi dai fameis  
de bande dai lôr parons a cjalin. **R.**

Come i vôi di une sierve  
de bande de sô parone,  
cussì i nestris vôi  
a cjalin de bande dal Signôr, nestri Diu,  
fin che nol varà dûl di nô. **R.**

Ve dûl di nô, ve dûl di nô, Signôr!  
Parcè che o sin passûts di vergogne.  
Masse saciade e je la nestre anime  
dal sghignê dai massepassûts,  
des ridadis di chei che nus remenin. **R.**

### SECONDE LETURE 2 Cor 12,7-10

**Mi vantarei vultintîr des mêis debolecis, par che e dismanti sore di me la potence di Crist.**

De seconde letare di san Pauli apuestul ai Corints

Fradis, par no che o montàs in supierbie pe grandece des rivelazions, mi è stade metude une spine inte cjar, un mes di satane che mi patafi par no che o monti in supierbie. Trê voltis o ài preât il Signôr di slontanâlu di me. Mi à rispuindût: «Tu âs vonde de mê gracie; la mê fuarce si palese te debolece». Mi vantarai duncje vultintîr des mê debolecis, par che e dismanti sore di me la potence di Crist. Cussì mi vanti des infermitâts, des ofesis, des dibisugnis, des persecuzions, des miseriis par vie di Crist; parcè che cuant che o soi debil, al è propit in chel moment che o soi fuart. Peraule di Diu.

### **CJANT AL VANZELI Zn 1,14.12**

**R.** Aleluia, aleluia.

Il Verbo si è fat cjar  
e al è vignût a stâ framieç di nô.  
A di chei che lu àn acetât  
ur à dât il podê di diventâ fîs di Diu.

**R.** Aleluia.

### **VANZELI Mc 6,1-6**

**Un profete al è spreseât dome te sô patrie.**

Dal vanzeli seont Marc

In chê volte, Jesù al rivà te sô patrie, compagnât dai siei dissepui. Rivade la sabide, al tacà a insegnâ inte sinagoge e tante int che lu scoltave a disevin maraveâts: «D'indulà lis tirial fûr dutis chestis robis? E ce sapience ise cheste che i je stade dade? E ce miracui fasino lis sôs mans? Po no isal il fari, il fi di Marie e il fradi di Jacum, di Josef, di Jude e di Simon? E lis sôs sùrs no sono culi framieç di nô?». E si scandulizavin di lui. Jesù però ur diseve: «Un profete al è spreseât dome te sô patrie, framieç dai siei parincj e a cjase sô». E nol podè fâ nissun miracul, dome vuarî un pôcs di malâts metintjur sore lis mans. E si dave di maravee pe lôr mancjance di fede.

Lui al leve pai borcs dulintor e al insegnave.

Peraule dal Signôr.

### **Su lis ufiertis**

Cheste ufierte consacrade al to non  
che nus smondei, Signôr,  
e nus quarti di zornade in zornade  
viers de vite dal cîl.  
Par Crist nestri Signôr.

### **Antifone a la comunion Sal 33,9**

Cerçait e o viodarês cetant bon che al è il Signôr:  
furtunât l'om che li di lui si pare.

### **O ben: Mt 11,28**

Vignît di me, ducj vualtris che o sês stracs e masse cjamâts,  
e jo us fararai polsâ, al dîs il Signôr.

### **Daspò de comunion**

Colmâts di tancj regâi, ti preìn, Signôr,  
di cjapâ ancje il regâl de salvece  
e di no cessâ mai inte tô laude.  
Par Crist nestri Signôr.